

Scheibenschlagen

2010

Nachname Vorname

Löschgruppe Graf-Gurnau

Grafer Kapelle

Liabe Leit, heint mecht mar enk olla schia begrießa,
wos d' rnoch iatz kimmt, sell kuan verdrießa.
Noch oltem Brauch tia mar ou Böller schiaßa.
A Verübl, dös war ins gor it recht,
a Hetz muaß sei, wega dem tia mar's decht.
D'Fuirwehr tuat enk in dr Noat olli halfa,
drum seits it beas und lot'sas galta.
Die earscht Scheiba, die hella,
keart dr Grafer Kapella.
Daß dr hl. Johannes von Nepamuk weiterhin über ins wocht,
und in dr letschta Stund für olla a Fürsproch mocht.

Da Böller hobts keart, iatz gia mar's on,
zearscht keima huira d'Gurnauer dron.

Thöni Maria

Die Maria hat's letsche Jahr auf'm Haus kriagt an nuis Dach
uans von Prefa ja des isch a Soch.
Deas holtat Wind und Wetter aus
und d' Maria tunkts fei drin im Haus.
D'Fuirwehr lasst dia Scheiba weit auße singa.
Sie sell dir für's negscht Jahr viel Glück und Gsundheit bringa.

Fam Juen Klaus Anna

Nach'm Klaus konsch s'Uhrwerk richta,
do kannta ma sicher einiges berichta.
Um siebne in der Früh da geagt er seine erste Rund
mit'm Hund und danach isch bei der Anni Fühstückstund.
S'Wetter tuat ihn gor nit imponiera
beim Rega tuat er holt mit Schirm umaspaziera.

Firma Maschler Karl

Dr Maschler stat da in bewährtem Glanz
Aber dr gleiche isch er decht nit ganz.
Seit Anfang des Jahres gib'ts nit lei 1 Gesellschafter sondern glei 3
Um da auf a Entscheidung zkema isch eppa viel drbei.
Dr Gerald als Geschäftsführer tuat deas tüchtig mocha
Drum lassa mar an Böller krocha!

Fam Siegele Waldemar

Dr Waldemar tuat die Pension schua fest genießä
Aber irgendwia tuat er decht zrug zur ÖBB verdrießä.
Jeder Freitag ziachtsn außä auf Landeck zu ara gmiatliche Runde
Alls lei ÖBB Leit deas isch in aller Munde.
Für'd Ruth wora die Leit in dr dritten Welt alli schua wichtig
und iaz isch sie ou da gwora ganz tüchtig.
Sie schaut dass Kuaner deren Rechte tuat verletza
Drum arbeitet sie iaz im Dritta Welt- Loda in Landeck und tuat Produkte absetza.
Die Scheiba tia mar weit außä schießä
und somit deas Sprichli abschließä.

Fam Juen Josef Paula

Huira hots die Gesundheitlich leider a bissli dr wurscha,
du bisch holt schua dausa aus dem Alter vo die Burscha.
Sou wars besser wenn da die Junga a bissli on treibsch,
dass ins du no a weil gsund erholta bleibsch.
Über die Paula kenn mar nit viel berichta,
auser dass sie tuat olli fleißig ihr Arbeit verrichta.
Miar hoffä eis bleibt's no long gsund,
dass eis erlebt's no an haufa schiani Stund!!!

Fam Juen Hubert Erika

Beim Hubert, jo do wett mar drauf,
kinnt in seim Job gwiss kua Longweil auf.
Gibt's a Problem im Stroßaverkehr oder schleicha Einbrecher ums Haus,
ruckt dr Hubert in Imst mit seina Chandi aus.
Vor a poor Wocha hoba si ihn an seim freia Tog ins Ötztol zitiert,
weil do isch eppas nit olltägliches passiert.
Hoba si nit a poor orme Schweine in Schnea ingroba
Damit di Forscher a poor Versuchsobjekte hoba.
Mit dera Schweinerei wor ober nocha glei Schluss
damit dia Tierschützer nit hoba so an Verdruss.
Der nägst Böller mocht an heida Knoll,
do hot's enker Schwein finer im worma Stoll.

Juen Julia

Seit'm Summa tuat Julia in dr Burg serviera
lasst sich bei der Arbeit nia blamiera.
Oan Gascht war sogar so z'frieda
dass er glei wollt mit ihr zum Pfarramt marschiera.
deis Johr set dr viel Glick geba
und dia Scheiba weit ausi segla.

Fam Schmid Helmut Linde

D'Linde hots fein, wenn sie Schifohra geaht,
neba Ihra olli an Privatschilehrer steaht.
Dear tuat dein Fohrstil olli kontrolliera
Un di auf d'r Pischta umakommadiera.
Dös loss di ober nit v'rdriaßa,
weil wenn di nocha amol trausch
konnsch alluan dia Pischta oachaschiaßa.
Und dass dia Zeit, bis es soweit isch, schneller vergeaht,
lossa miar nou a RAKETA vor Eard.

Fam Schmid Harald Angelika

Als Kommandant stellt d'r Harald sein Monn
Und isch bam Sport nit ungeara vorna dron.
Nu tuat s'Alter schua ab bissli winka
Drum stolpert er bam Fuaßbollspiel über di eigene Schinka.
Dia Knoch und Bandla hebe ou numma ollas aus
Nocha londet d'r Harald öfter im Kronkahauss.
Dös weard, denkt er si, numma besser weara,
iatz gaeht er holt Schifohra mit da olta Heara.
Miar winscha dir s'huirige Johr unfallfrei
Und bei dem Wunsch isch ou a Raketa d'rbei.

Schmid Daniel

Dr Daniel hot des Bundesheer absolviert,
und isch neiba zuacha mit dar Feuerwehr fleißig uma marschieret.
Er hot auf den Bronze Bewerb viel trainiert,
und dr bei so einige Varianten aus probiert.
Beim Bewerb isch' s noch gloufa jo wia gschmiert,
und na seits als dritte vom Plotz marschieret.
Miar hoffa dass da bei dar Fuierwehr so fleißig weiter mochs,
ou wenn momentan in Innsbruck aus der Wohnung lochs.
Du hosch iatz nämlich dunta ongfonga studiara,
und dass deis ou guat mochs dia mar no a Rakeita spendiara!!!

Schmid Thomas

Ja dr Thomas isch iatz s'erschte Mol auf dr Listn drau
seit kurzem isch er 18, deis wiss ma genau.
Letztes Johr hot er den Führerschein gmacht
und di Prüfung mit Bravour gschofft.
Iatz tuat d' Fuirwehr zum Bewerb in Axams no gratuliera
und dir a Raketa spendiera.

Fam Grießer Hubert Rosmarie

Die Zeit als Chef von der Fremdenpolizei
Isch für n Hubert iatz vorbei.
Si dauernd mit dena Zuagroasta umaploga
Schlogt uam vorzua auf'n Moga.
Dr Hubert buggelt iatz in der BH a poor Büros weiter
im Referat Natur und Umwelt als Sochbeurbeiter.
Als Friseurin olli mit Schar und Fön in dr Hond,
weart di Rosa mit da Johr heillos versponnt.
Der Kopfweah weart uafoch nit besser,
drum legt sich d'Rosi im Spitol unters Messer.
A schiana Raketa schiaß mar für di, do hommar kua Rui,
Und wünscha dir, dass di bold wieder fühl'sch wia nui.

Grießer Elisabeth

Die Elisabeth hot iatz an nuia Job,
auf der BH in Imst, und der isch sicher Top.
Der tuat dir aber nit longa,
drum hosch mit der Abendmatura in Imst on gfonga.
Dia dauert zwor 4 Johr,
aber Zeit isch's weart deis isch klor.
Miar wünscha diar dr zua viel Glück,
dies meistersch du aber schua mit deem Geschick!

Grießer Eva Maria

Wos sella miar eppa über d'Eva schreiba
denn si tuat sich olli über Lond umchatreiba.
Olles wos miar wissa zum Berichta
Weara miar probiera in deam Sprichla z'dichta.
Sie hote dia Schual im Deutscha fertigmocht
Und ou glei an Freind onglocht.
Z'Silvester hoba si dia zwoa dahuam umchatriebe
Ober sein nit long ba ins o blieba.
Hotel Mama si genossa, dies tian mar hoffa
Ober a poor Tog spater sei sie schua wieder nach Vorarlberg aussigloufa.
Dett hosch iatz ja dein Wohnung un den Job,
dean erledigscht du sicher Tip - Top
Hoffentli osch du di wieder öfter blicka,
drum tian miar ou nou a RAKETA in Himmel aui schicka.

Fam Scheiber Helmut Martha

Skifahra isch in dr Familie Scheiber seit alli schua ganz wichtig
Und seit kurzem trainiert dr Michi besonders tüchtig.
Dr Helli fahrt mit ihm ganz Tirol aus
Und dr Michi erntet bei die Rennen viel Applaus
Ou die Martha hat mit ihra nuia Ski und mitm Rennrodel alli die nuischta Socha
Bei ihra hatta so manche Rennläufer nix zum locha
Bleibats weiter so aktiv und fit
Und mir wünscha dr Scheiba an guata Ritt.

Scheiber Robert

Zum Orbata konnsch in Robert für olli und für ollas hoba
Do brauch ou nuit long froga.
Nur mit ara Bohrmaschin hot er sei Gfrett
Er bringt uanfoch kuan Schraufa incha in a Brett.
Dia nuia Bohrer sein numma wia die olta,
do konn ma von Links - auf Rechtslauf umscholta.
Robert, tua s'negsch mol noch rechts lufa lossa dia Maschin
Denn erst noch mocht deas Gonze ou an Sinn.

Scheiber Peter

Letschts Johr wor dr Peter beim Fröschl auf'm Bau,
ober auf den Job haut er den Huat iatz drau.
Ou dia Gschicht mit'm Schi präpariara
tuat ihn numma gorso interessiara.
Miar hoba eppas singa keart,
dass dr Peter iatz an Eisenbohner weart.
Do fohrt er noch mit schwara Loka durchs Lond,
und hot an sichera Job in dr Hond.

Scheiber Markus

Beim Markus isch es ou soweit
sei erschte Scheiba die fliagt heit.
In Strengn im Gasthof Post tuat er sei Lehr absolviera
muass sich aber im Winter lassa eichi chauffiera.
Zum guatn Erfolg beim Fuirwehribewerb in Axams tian mir gratuliera
und lassn dafür an lautn Böller explodiera.

Rainalter Ekehardt

Beim Eki isch die anstrengentschte Zeit mit`m Kind iatz ou vorbei,
drum haba sa iatz Zeit für anders allerlei!
Mit`m Wohnwaga sein sie in Urlaub gfahra,
geaba hat`s lei a Freid und gar kua Zoara!
Miar winscha enk 3 s` beschte für`s huirige Jahr,
und schicka enk a Scheiba bis ganz durchah!

Fam Rainalter Ekehardt Hella

Huira isch bei dr Hella a Problem mit ihrem Auto gweasa,
ma selt halt decht vorher die Betriebsanleiti leasa!
Weil wenn`s Enkele und der Autoschlissl im Auto liega bleibt,
die Hella dem ÖAMTC zu hilfe schreit!
Dr Theodor hat`s im Auto ganz nett hetzig ket,
mei isch deas ohne Schlissl zum einkeama a Gfret!
Probiert haba sie den Autoschlissl zum angla,
es tuat halt an der Zusammenarbeit mit`m Bua mangla!
Die Heckscheiba haba sa miaßa derschлага,
weil die Hella hat dia Situation schua anfanga plaga!
Die Scheiba hin und der Fuß verletzt,gwesa isch es alles zam kua Hetz!
Miar hoffa es isch sinscht weiter nuit passiert,
auf deas aui a Scheiba in`s Tal achi maschier!

Fam Huber Robert Gabi

In seiner Pension stellt d'r Hansrobert olles mögliche on.
Do tuat er nit long worta,
und mocht si an - glei an Tomatagorta.
Und tuat dia Pflanzl fleißig giassa
damit dia Blüta ou richtig spriessa.
Er kimmt aus dem Stauna numma aussa,
wia er vom Urlaub kimmt und schaut zu d'Tomata aussa.
A Wunder isch gschecha ma konns nit glouba,
in deara kurza Zeit hänga schua roate Tomata doba.
D'r weil wora dös, o Schreck oh Graus
Plasiktomata vom Aus und Raus.

Huber Susanne und Peter

Dia Susi tuat iatz renoviera
Uns s'hinter Kammerli ausstaffiera.
A großer Koschta und a Sofa
Damit sie manchsmol a Ruah hot zum Schlofa
Drum winscha miar ihre schua heit
An g'sunda Schlof zu ihrer Zufriedenheit.
Und dass du kuan Huschta kriagsch auf deem Sofa
tata miar Dir schua a wormi Bettdecka koufa.

Fam Schütz Egon Sissi

Ma tat's v aussen gor nit ohna,
bam Egon und bar Sissy wora großer Umbaumaßnohma
A morz Wellnesonlog hatt d'Sissy im obara Stock gonz geara
Do kimmt d'r Egon foscht zum bleara.
Wer's baua muaß, isch ehj gonz klor,
deas isch sicher gelunga, und eas hob'ts deswega nit mia graui Hoor.
Selche Socha sett ma ou geara mocha
Und d'rbei ou nit v'rgessa zum locha.
D'r Egon tuat selche Projeke eh olli gscheit durchführa
Rum tuat d'Sissy sou geara onschoffa bam Renoviera.
Miar hoffa, es seids zu'frieda, wias g'woars isch
Drum schicka miar dia Scheiba bis achi zum Boch on ,d Fisch.

Schrott Werner Gudrun

Iatz schicka miar für'n Werner und d'Gudrun a Scheiba auf d'Roas
Deas sein v'r Schütza Sissy der Brud'r und d'Schwägerin, wos nit jeder woäß.
Dia tian si im Deutscha daussa für Grofer Fuirwehr interessiera
und olli auf [www.Grofgrunau Punkt AT](http://www.Grofgrunau.Punkt.AT) spioniera.
Für dia Spende tian miar Donkschia sogä
Und zur Scheiba nou a RAKETA auchi-joga.

Schütz Florian

Dar Florian isch ganz offen für nuie Socha,
grad in dar Alternativmedizin, muaß ma da Selbstversuch mocha.
Akupunktur zur Behebung körperlicher Gebrecha,
amal schaua ob deas heppt, wos die Leit ins versprecha.
A Nodla ins Ohr, a Nodal in Arm und schua konn d'r Flo wieder loufa,
da weart er sich sicher bald selber a so a Nadel-Set koufa.
Aber Flo, zur Behebung vun am Brand isch deas vielleicht nit optimal,
a bissli wianiger trinka isch a Möglichkeit optional.
A erfolgreichs, gsunds und aktives Jahr,
für deas fliagt iatz nou a Scheiba durchoh.

Fam Larcher Peter Margret

Ba da Auto isch es wia im Leba
Wenn du olt bisch, wearsch uanfoch abgeba
Iatz steht an nuia Touran vor d'r Tür
Wos konn denn eppa dear olte Suzuki d'rfür?
Dös nui Auto wor amol bei der Polizei
Do habe sie sicher da una oder ondara Strofzettel frei.
Dean nuia Woga settats long guat um d'Kurva bringa
D'r für lossa miar a RAKETA singa.

Larcher Mathias

Im Winter tuat d'r Mathias die Gäste im Schibus umchakutschiera,
damit die kenna auf die Pista oder glei zum Apres-Ski marschiera.
Lei wenn der Job isch nach d'r Saison wieder aus,
hasch d'r vorgnoma zum baua a schianes Holzhaus.
Die Pläne vom Haus sein schua g'macht,
die Umsetzung isch mit d'r richtiga Hilf sicher kua Problem, sall war ja g'loacht.
Als Bauleiter wearsch eh in Vater engagiera,
nacha kann da nix mehr passiera.
A Raketa iatz no in Himmel auchi singt,
damit deas ganze Vorhaben guat gelingt.

Vogt Irene

Wenn´s Wetter passt und eis isch schian,
sigt ma die Irene mit dr Herta spaziara gian.
Sinsch kenn mar leider nit viel schreiba,
weil die olli tuasch wo ondersch uma dreiba.
Iatz dia mar no dia Scheiba weit oa schicka,
auf deis dass die losch öfter blicka!

Vogt Herta

Bei dr Herta gibt`s huir a morz Fescht im Garta,
miar kenna`s iatz schu kaum nou derwarta!
Ihre 60er Jahr keama iatz schia langsam zu' nam End,
da kama miar alle geara auf a Bier und a Marend!
Die erschts 70 Jahr hat die Herta iatz ou schua gschafft,
miar winscha dir für die nägschts 70 ou nou viel Kraft!
Bei dera Gelegenheit kanntesch iatz dein Garta glei zua saja,
na hattesch wianiger zum jeata, dafür halt mia zum maja!
A morz Feschtzelt braucht halt amal viel Platz,
aber für so an Anlass war deas sicher it für die Katz!?
Tuasch ins bei dera Fete halt it gara so übertreiba,
drum lassa miar iatz auf deas aui nou a Raketa steiga!

Fam Schultes Hubert Brigitte

Beim Hubert und dr Brigitte tia miar halt it viel derfraga,
drum tian miar sie ou it pflanza oder lang plaga!
Guat ganga isch im letschts Jahr alles zamm,
miar hoffa eas bleibat`s ou im huiriga fleißig drann!
Gsundheit, Glück und ou viel Sega sell enk s` Jahr bringa,
drum hoffa miar die Scheiba tuat ganz weit achi singa!

Fam Marth Edmund Helene

Huir kimmt amoul d'Helene dron,
weil sie eppas schua numma d'rworta konn.
Sie tuat eppa schua a bissli mit d'r Pension spekuliera
Und auf dös ou schua fescht trainiera.
Ba Wind und Wetter geht sie z'Fuaß auf Zoms in d'Orbat und wieder aucha
weil die Kondition komma nocha in d'r Pension sicher guat brauchta.

Fam Landerer Franz Elfriede

Selbst in dar Pension gibt's alli eppas zum tian,
aber Franz, sinscht wars decht langweilig und gar nit sou schian?
Ma set alli auf seine Socha schaua,
drum hat dar Franz anfonga, sei Elternhaus umzbaue.
Das da als guat geht und s'Ergebnis ou gfallt,
iatz nou an Böller für enk knollt.

Würthenberger Claudia u. Armin

Schifohra, deas isch wunder schian,
warum set deas nit die ganze Familie miteinander tian?
Dar Jonas isch nou kuane 3 Johr,
und schua rauscht er die Pischta durchoa.
Schu fost 20 mal auf dar Strecka, deas nennt ma Eifer,
weart deas eppa dar erschte Gurnauer Ski-Rennleifer?
Für enk lossa mar iatz an Böller krocha,
und tiats schua amol an Platz für die Pokal und Medaillia mocha.

Öttl Wolfgang Christina

Beim Wolfgang & dr Christina tian miar ins schwar beim dichta,
da gibt`s gar nix bleads zum berichta!
Aber Gsundheit, Glück und a freid sellat`s auf alle Fälle huir ou wieder haba,
und dass enk nuit schlimms tuat plaga!
Mir secha enk lei beim Spaziera,
wenns tiat's Popali ausfiehra.
Miar hoffa für enk tuat alles sou guat tuat bleiba,
auf deas miar iatz a Scheiba ganz weit ausi treibal!

Fam Pfeifer Karl Brigitte

Ja, ja, ma sagt der Hund isch dar beschte Freund vom Mensch,
deas stimmt aber lei, wenn nit alli hinterm her rennsch.
Die Brigitte und dar Karl hoba gleich zwoa Hund wou bella,
und halt nit olli sou wiars Herrchen und Frauchen wella.
Aus deam Grund muaß ma dia zwoa trainiera,
dass sie am Schluss Sitz-mocha und aportiera.
Aber sou a Hundetrainig isch nit leicht und ou nit alli schian,
drum sieht ma ab und zua an profesionella Trainer vor dar Haustiar stiahn.
Dass enk deas abrichta guat gelingt,
iatz nou a Scheiba übrern Bichl ocha singt.

Pekar Manfred und Sabine

A so a eigens Haus deas isch recht schian,
aber es isch holt ou alli eppas zum tian.
Alli eppas zum herrichta und zum renoviera,
deas Haus set halt nit sein Weart verlierera.
Energiespora, deas isch iatz dar letschte Schrei,
und ou dar Manfred und d'Sabine sein da mit dabei.
Heizkosten senka, deas isch decht zum locha,
da muaß ma lei nuie Fenschlara icha mocha.

Sailer Gerhard & Brigitte

Für enk zwoa darfa miar huira zum erschta Mol a Scheiba schiaßa,
miar mechts enk herzlich in Gurnau begrißa.
Miar hoffa eas föhlats enk wohl im nuia Haus,
und ziachats nit sou schnell wieder aus.
Zum Schluss lossa mar an Böller krocha,
dean ma überall heart, deas war decht zum locha.

Carpentari Jürgen und Sonja

Dar Jürgen isch in am Alter, da weard ma richtig brav,
ma geiht friah ins Bett weil ma braucht ja da Schlaf.
Die Sonja hat sich vor Jahren tätowiera lossa,
aber mit der Zeit ischas numma sou nett und die Forba verblassa.
Aus deam Grund hat sie über ihren Salamander drüber tätowiert,
miar winscha dar, dass es nuie Motiv nit ou wieder in Reiz verliert.
Im Nevio, enkarm Kluana, sogä miar a groaße Zukunft voraus,
als Kletterer ziacht dear amal in die weite Welt aus.
Enk zwoa und enkare Kinder sell dia Scheiba Glück bringa,
und ganz weit übern Bichl ocha singa.

Fam Carpentari Reinhard Michaela

Nach am arbeitsreicha Johr isch ma soweit,
ma will in Urlaub, am beschta ganz weit.
Im letschta Johr in der Türkei wars recht fein,
davor muaß aber nou a bissli Vorbereitung sein.
Damit ma sich am Strand nit muaß blamiera,
set ma davor holt a bissli trainiera.
Zu deam Zweck habats enk a Powerblade kouft,
obs iatz mitm Astralkörper sou richtig louft?
Miar winscha enk fürs nächste Johr alles guat,
und am Schluss an Böller fürn Reini, für deas, was er als für Graf und Gurnau
tuat.

Carpentari Rosemarie

Dass di Rosi geara z''Fuaß geht, isch ins bekonnt,
letschta Mai wor si zum Wondera sogor in Griechenlond.
Den Urlaub hot si total genossa,
ober ou a bissli um ihren Schotz dahuam verdrossa.
Seit'm Herbst steht vor'm Haus ou an nua Woga,
an Haufa PS und Ollrod weart des Gefährt schua hoba.
Des konn di Rosi iatz guat braucha,
dass si in Koppl drin dia steil Stroß kimmt aucha.
Dia Scheiba tia mar weit auße treiba,
tua nit z'viel im Paznau drin bleiba.

Fam Carpentari Reinhard Marlies

In die Gurnauer Winter ischas halt recht kalt,
drum holt dar Reinhard darvor viel Holz ausm Wald.
Schu metrig im Wald zuagschnitta, deas isch an Traum,
und ab mit deana Scheit in Kofferraum.
Bei dar letschta Fohrt wara nu mia 2 Scheit liega blieba,
deas war decht glocht, dia kriagt dar Reini ou nou in Kofferraum icha.
Am Schluss lei nou da Kofferraumdeckel zuagmocht,
aber wia er dean zuahaut, es lei mia krocht.
Beim nächsta mal machsch holt nou a zusätzliche Fohrt,
nocha bleibt die Scheiba in deem Auto ou hort.

Carpentari Julia

Iatz steigt amol a Rakeita auf,
die Julia hom mar s'erst mol auf dr Lista drau.
Du hosch huira die Schual fertig gmocht,
und dr' mit die Matura g'schofft.
Iatz moch' sch die Schual zur Kronkenpflegerin,
dia kriagsch du sicher ou gonz guat hin.
Miar wünsch dia dr zua viel Glück,
aber des schofsch du sicher mit deem Geschick!!!

Carpentari Carina

Die Carina sigt ma bei ins nu mia selten uma springa,
weil sie tuad mia zeit bei ihrem Freund drin in Kappl verbringa.
Miar hoffa du duasch ins nit gonz vergessa,
und kimsch zumindast a Kaaskiachli essa.
Iatz dia mar no ua Scheiba weit oa schicka,
dass die losch wieder öfter blicka!!!

Wilhelm Karin

Karin, mir kenna deas kaum glouba,
stiahn wirklich schu 40 Jahr auf deim Reisepass douba?
Aber mach dir nix draus, ma isch alli lei sou alt wia ma sich fühlt,
s richtige Alter da nit a sou a große Rolle spielt.
Mir wünscha diar für deas Jahr als Guat und nu s;Bescht,
und dia Scheiba schloga mar auða für die ganz fescht.

Pfisterer Dieter Christine

Dr Dieter isch mai lebti fleißig im Holz,
da hat die Christine klarerweis an morz stolz!
Gnuag von deam Holz kann ma nia haba,
drum tuat`s in Dieter a bissli plaga!
Aber eigentlich tian sie`s holza richtig geara,
Drum lossa mir zu deara Scheiba a RAKETA aui zu da Steara.

Pfisterer Peter

Vom Pete kenna mir enk huira berichta,
dass'r wieder tuat die Felswänd ober die Straße herrichta.
Bei so am Job muaß ma in ganza Tag viel schware Sacha umchalupfa,
da isch's ganz fein am Wochenende a Bierli zupfa.'
Beim Ausgiahn trifft ma in Pete öfters an,
da steht ma nacha glei für an Ratscher zamm.
An Böller iatz no ganz laut kracht,
damit d'r dei Arbeit no lang a morts Freid macht.

Fam Haag Sabine u. Peter

D,r Sabine und dem Peter winscha mir a schiani Zeit,
und dass ollas guat und z'frieda bleibt
Mit Kinder, Job und Haus isch olli viel zum tian,
ober z'guater Letscht isch es holt decht wunderschian.
Ou s'Olter mocht bar Sabine nit Holt,
drum iatz zum 40 iger ou nou a RAKETA knollt.
Mir hoffe, es tiat's glücklich und g'sund bleiba
Auf deas aui, mir enk die Scheiba weit aussì treiba.

Fam Schütz Erwin Christine

Beim Erwin und d'r Christine steht fast jed's Jahr a nuis Bauvorhaben an,
letscht's Jahr war an morts Dachausbau dran.

A Wohnung für'n Manuel habt's es da zamm baut,
a Zeit lang war's in enk'r Wohnung drunter sicher ganz laut.

Miar hoba kaeart, dia Wänd sein grod wia ama Reißbrett konstruiert,
do isch dia Wohnung im obara Stock ou glei integriert.

Zwoa Generationen unter uam Dach isch sicher ganz fein zum leba,
da gib's olli eppas zum reda und gemeinsam's d'rleba.

Dass deas zusammen leba gut gelingt,
a Raketa in Himmel auchi singt.

Schütz Manuel

Beim Manuel isch im letschta Jahr einiges passiert,
sei nuie Wohnung isch fascht komplettiert!

Gaupa, Fenschter und die Wänd sein fertig gwoara,
iatz muass er lei mia a Loch für sein Stromanschluss boara!

Dr Manuel kimmt dahuam ou ohne arbeita fescht zum schwitza,
weil dr Kofler tuat ihn mit`m Heizmaterial fescht unterstütza!

Manuel`s Devise isch halt spara wo`s geat,
nit dass uam spater die Bank die Ohra voll bleart!

Auf deas dass alles guat geat,
dir iatz a Scheiba in`s Tal achi bleart!

Fam Walter Markus Sybille

Bei dar Sybille im Frisiersalon giahn viel Leit aus und in,
nu mitm Auto woäß ma nit alli wou hin.

An Parkplatz muaß hear, deas war decht zum locha,
gar kua Problem, dean kann ma ja salber mocha.

Aber im Markus isch a Verletzung darzwischa keama,
da kann ma s'Werkzeug numma selber in d'Hand neahma.

Dar Schwiegervater hat fest gholf, damits mitm Parkplatz decht eppas weart,
iatz schiaß mar an Böller, dean ma ou im Friseursalon heart.

Walter Berta

Die Berta war huiru fleißig am Weag,
ma tat`s it gloaba wie weit dass es sie treat!
Auf Canada isch sie umma gfloaga zum die Schweschter bsuacha,
ganz umma sinsch hatt ma die Weihnachtskeks Dahuam anfanga suacha!
In dar ganza Walt tuat sich die Berta anfanga ummatreiba,
miar hoffa du tuasch aber schua in Gurnau bleiba!?
Hoffentli tuasch ins nou lang gsund und glückli bleiba,
auf deas aui tian miar dir a Scheiba bis in die Ebne achi teriba!

Vollath Hubert

Der Hubert isch im groaßa Boaga
über insere Dacher nach Canada gfloaga!
Ma merkt er weard a bissli älter,
hat glatt gmuant da deat isch es viel, viel kälter!
Und dass dem Hubert nuit passiert,
isch die Berta klarererweis ou mit maschieret!
Weil falls der Fliager ochi kracht,
hat die Berta ihm da Gurt zuagmocht!
S´ Gfährlichschte isch ja deas ausifalla,
und zum schluss am gfroarena Meer aufknalla!
Aber zum Glück isch ja eh nuit passiert,
drum iatz nou a Rakeata marschieret!

Senn Verena

Seit mehr als am Jahr tuat die Verena in Innsbruck an Haushalt fiarah
Und da und dett kriagt sie ou die Tücken z'spiera.
Sie und ihr Freund tia sich da und dett sicher Zuneigung geba
Aber wenn ma nit aufpasst kann schua was anfangen zu leba.
Denn Ungeziefer hat sich im Mehl breit gemacht
Und sie am morgen beim Frühstück onglacht.
Im nu haba sie die ganzen Lebensmittel in Boxen sortiert
Dass sowas numma passiert.
Iatz dia mar dia Scheiba weit auße schieße
Und hoffa dass du ou a bisli tuasch nach Gurnau verdrieße.

Senn Anna

Dia Scheiba tia mar weit aua treiba,
und a bissli bei dr Anna bleiba.
Letschta Summer isch es ihr nit so guat gonga, do wor si im Spitol,
des wor fr di Anna natrli a furchtbora Quol.
Ober di Anna isch an zacha Knocha,
auf dr Soga doba wor si schua wieder noch a poor Wocha.
Iatz geht si wieder fleiig oll Tog spaziaru,
weil des Herz und die Muschgla mua ma trainiaru.
Moch nu weiter so und loss di nit unterkriaga,
di Fuirwehr wnscht dir olles Guate und losst fr die no a Raketa fliaga.

Fam Senn Werner Brigitte

Die Senns hoba seit'm Frhjahr an nuia Balkon,
und die Leit, dia vorbeigiah, schaua sich den ou on.
Si denka, der hot a eigenes Design,
nit schiach, nu ziemlich groae Lcher dazwischu drein.
Di Kinder sei so schua groa, do weart kuans mia auafolla,
und schliali mua es jo da Senns nu gfolla.
Monate spater, ma konns nit globa,
sei stott da Lcher schiane Plotta doba.
Di Hondwerker hoba so ewig braucht, dia wora Schuld,
und hoba ausgenutzt vor Brigitte ihr Eselsgeduld.
Miar schicka a Rakete in d'Nocht, gonz ohne Eile,
frei noch dem Motto „Gut Ding braucht Weile“.

Senn Evi

Mir hatta gera g'schriebe a lngrs Gedicht,
nur kriag't ma die sehr selten zu G'sicht.
Ma sieht die ab und zu im Auto hocka,
da mias m'r die in Zukunft mehr ausi locka.
Vielleicht wissa m'r no mia G'schichta,
ber dia m'r kenna negscht's Jahr berichtla!

Fam Senn Arnold Ursula

Dia Isowelle hat d' Arnold und d'Ursula voll im Griff
Drum kriagt ou glei ihr Haus an nuia Schliff.
Ummadum weard ollas isoliert
Und d'rzua a jugendlicher Forbton krieriert.
Bam Balkon hot er a weil studiert
Und stott der Brüstung Kollektora montiert.
Iatz kann er olli im Pitschama im Haus ummaloufa
Und braucht ou numma so viel Pellets koufa
Dia gonze G'schicht isch guat gelunga,
drum hot iatz zu deara Scheibe ou nou a RAKETA gsunga.

Fam Plattner Wolfgang Angelika

Die Angelika losst si verwöhna bei der Sibylle im Friseursalon,
do fliagt si plötzlich an Gedonka on:
Hot si di Kerza beim Adventkronz ausblost beim Außagiah?
Si sieht schua ihr Haus in Flomma stiah.
Di Angelika holtets auf dem Friseurstuhl numma aus,
mit der Tönung im Hoor sprintet si ocha über d'Stiaga zu ihrem Haus.
Jo Angelika, was ma nit im Kopf hot, hot ma in da Fiaß,
vom Alzheimer und vor Fuierwehr schiane Griaß.
Im Wolfgang wünsch mar viel Erfolg bei da Wohla mit seiner Lischta,
und hola für ihn an Böller aus dera Kischta.

Plattner Christian

Iatz steigt amol a Rakeita au,
da Christian hom mar s' erst mol auf der Lista drau.
Als erstes well mar diar zum Führerschein gratuliara,
dein hosch gschofft ohne den Prüfer zu manipuliara.
Du bisch in dar Schual ou ongarschiart,
drum hot dir dr Votter glei a Auto spendiart.
So hosch' s iatz jo ou gonz fein,
und fohrsch mit deim Auto nach Fulpmes ins Heim.
In dar Schual hosch zwor ou a Stresserei,
trotzdem bisch bei dar Fuierwehr fleißig dr bei.
Ou beim Bewerb worsch mit von der Partie,
do bisch gloufa, dr noch worsch fost hie.
Des viele Prouba hot sich rentiart,
so bisch du als dritter vom Plotz marschiart.
A Bierli keart dr nach natürlich ou dr zua,
nu manche kriaga vo uam nit gnua.
Sou drinka dia holt uan odr zwoa z' viel,
nu dr Moga hot nit gonz so viel Spiel.
Wenns so weit isch no miasa sie sich übergeiba,
und am negsta Tog mit mortz ma Koter leiba.
Miar hoffa du losch die dr von nit unter kriaga,
und dia dr no an Böller spendiara!!!!

Plattner Kathrin

Die Scheiba tia mar weit ausa schießa,
mir hob keart d' Katrin tuat fescht um ihren Freund verdrießa.
Der studiert nemli seitm Herbst Informatik in Wien,
und so allua do in Gurnau mocht ou kuan Sinn.
Drum hockt si sich oll zwoats/dritts Wochenende in Zug,
und fohrt zum Schotz, do vergiah dia Stunda wia im Flug.

Traxl Richard

Der Traxl Richard, ja Leit es sich wohr,
der isch übersiedelt im letzten Johr.
Er wohnt iatz in Grins und schaut abi zu ins.
Richard laß es dir guat giahn und fein
und wenn ab und zua zu ins abi spaziersch tat ins deis recht fescht gfrein.
Drum laß ma dir a Raktetn no steign
weil für ins wearsch immer a Grafer bleib'n.

Kobler Maria

Dia Scheiba sell b'sunders weit außigiahn,
weil iatz bleib m'r bei d'r Maria stiahn.
Fürs Johr 2010 wünscha m'r dir lei s'allerbescht,
G'sundheit, Glück und Fröhlichkeit ganz fescht.
Dass s'heurige Jahr koane Probleme macht,
an Böller ganz laut kracht.

Fam Kobler Gerald & Gabriele

Wenn dr Gerald isch versponnt oder wenn ihn di Muschgla brenna,
muaß er nit glei zum Doktor renna.
Er legt si uafoch dahua zur Gabi in Massagesalon,
wia mir den beneida, den guata Monn!
Do weart knetet, druckt und massiert,
bis ihm nuit mia weah tuat garantiert.
So a Therapie für ins Fuirwehrleut tat ins ou recht gut gfollla
drum lossa mar iatz no an Böller knolla.

Perktold Michael

In Michael tian m'r huira s'erschte mal bei ins begrießa,
und dia Scheiba glei b'sonders weit außi schießa.
Beim ersta Sprichla tian m'r di no a bissli v'rschona,
mir hoffa du tuasch deas beim Kassiera mit am Schnapsli belohna.
Damit m'r deine negscht'a Schandtaten alle d'rfraga,
wera m'r iatz no an Böller im Feuer plaga.

Schlatter Harald & Melli

Im Harald und d'r Melli kenna mir huira zum Nachwuchs gratuliera,
und lassa dafür glei a Raketa in Himmel auchi marschiera.
Lena und Hanna habt's es die zwoa Madl toaft,
und glei alles doppelt koaft.
Mit so zwoa süße Zwilling isch sicher olli viel zum tian,
und ou fleißig zum spaziera giahn.
Damit es in Zukunft mit die Madla habt's no viel zum lacha,
lass m'r iatz no an Böller kracha.

Fam Schlatter Engelbert Stefanie

Über Longweil konn si dr Engl und d' Stefanie nit bekloga,
iatz kenna sie sogar Zwilling im Plon doba umatroga.
Dia zwoa Madla bringa d' Nala und in Neni in Schwung,
und so viel Jugend holtet gwiss ou jung.
Di Zweisamkeit wella dia zwoa ober ou nit missa,
drum hoba si iatz ihr Schlofzimmer außagrissa.
Weil in so nuia Better drein,
tunkts enk zwoa gwiss doppelt fein.

Nöbl Hannes

Als Musiker isch d'r Hannes im ganza Bezirk ja schua bekannt,
lei um sei Popularität zu steigern muaß ma weiter umchakema im ganza Land.
So an Bandwettbewerb isch da a super Sach,
da trifft ma viel Gleichgesinnte vom Fach.
In Innsbruck die Vorrunde locker überstanda, sall war ja g'lacht,
habt's glei drauf bei d'r nächsta Runde in Wien mitgmacht.
Deart isch's nimmer so guat g'loafa,
s n'egschte mal missa oanfach mehr Fans Karta koafa.
So a Rockerleba tuat d'r Körper natürlich ou g'spiera,
drum tuat d'r Hannes iatz viel sein Körper trainiera.
A hochmoderne Pulsuhr muaß da her,
damit ma in Zukunft hat konditionell nie mehr a Gscher.
Mir haba keart du tuasch huiru dein ersta Halbmarathon bestreita,
für deas Vorhaba lassa m'r iatz no a Raketa in Himmel auchi gleita.

Nöbl Anna

An Böll'r tian miar iatz onreiba
Und dia Scheiba v'r Anna weit aussitreiba.
Dazua winscha miar nou Glück un G'sundheit
Und dass du ou bewohrsch dein Heiterkeit.

Fam Nöbl Ferdinand , Romana

Dia Scheiba sett giahn weit und schian
Weil iatz bleiba miar bam Ferdl und d'r Romana stiahn.
Zearsch miaßa miar d' Romana loba
weil iatz isch sie Abteilungschefin im Londegger Altersheim doba.
Die nui Mahmaschine vom Ferdl isch sicher an Hit
nu als Wellnessgerät taugt sie nit.
Drum tian si glei a Wärmekabine installiera,
um dia gstresste Körper wieder auf z'poliera.
Deas Infraroat sett wieder viel Jugend bringa
Desholb lossa miar ou nou a Raketa singa.

Nöbl Markus

An Brief anan Markus zum schreiba wor deas Jahr a Totur,
denn bis dr Postalar sein momentana Wohnsitz gfunda hat breicht er sicher a Kur.
Nach Langem hin und her wohnt er decht wieder in Graf daußa
und somit kann er iaz wieder in Null Komma Nix zur Feuerwehrhalle saußa.
Ou bei am neua Verein isch dr Markus ganz vorne dabei
Bei da Kramperla, denn da brauchts Kraft und Energie allerlei.
Dass die überall weiter so guat tuasch ongagiera
Lass mar iaz a Scheiba maschiera.

Kirschner Katharina

Kathi isch iatz doba im Altersheim
do hot si's mit Traxl Richard sicher fein.
Di zwoa wera iatz ins Grins Graf vertreta
mir schicka enk oua a schiane Raketa!

Staub Marco

In Marco seacha mar s'aller erschte Mal vu insarar Lischta locha,
da miaßa mar glei a kluine Einführung mocha.
A Kischta Bier für die Fiuerwehr, deas isch bei ins Brauch und Sitte,
sou bisch herzlich willkommen ins unserer Mitte.
Iatz schiaßa mar dir nou a Scheiba durchah,
und winscha dir a netts und schians Johr.

Dablander Markus

Dar Markus isch hui ra s'erschte mal mit dabei,
drum schiaßa mar a Scheiba iatz glei.
Wenn amal gar nit woasch was tian,
kimmsch bei dar Fuiwehr vorbei, da ischas alli recht schian.

Macanov Madine

Zur Begrüßung lossa mar dir glei a Scheiba singa,
dias sell dir im nuia Jahr viel Erfolg und Glück bringa.
Miar hoffa du fühlst die in Graf wohl und haschas fein,
wenn s'Liacht brennt, keahr uanfach amal in dar Fuierwehrhalle ein

Braunsdorf Silke

Die Silke haba mar huira s'erscht mal auf dar Lischta,
miar tata wosch schreiba wenn mar was wischt.
A Scheiba sou laut, dia sell ma überall heara,
dass du insarn Brauch kannsch kenna learna.

Aydogdu Ali

In Ali hoba miar leider nou gar nia gseacha,
dabei woahnt er vu dar Halle ganz in dar Necha.
Im nägschta Jahr hoffa mar amol auf an Bsuach,
nocha schreiba mar die in, in insar Gästebuach.
A Scheiba ausm Fuiar, ganz rot und schian,
dia sell für die bis übern Bach ocha giahn.

Strigl Andrea

Die Andrea seacha mar huira s'erschte Mal,
drum macht iatz glei an Böller an Knall.
Miar mechta die recht herzlich in inserm Dorf begriäa,
und weara dar iatz a Scheiba auäa schiäa.

Moschen Norbert

D´r Norbert isch iatz mit dem Umbau am Ende,
es zeigt den Erfolg von viel Arbeit und fleissiger Hände.
Die Heizung im Haus isch nit zum Finda,
des heiße Wasser muass vom Thurnerhaus sich ocha winda.
Die Fenster sei ganz nui und groass,
die Heizung loft ganz hoass.
Norbert mir mechta die no mal in Graf begriessa,
iatz tian mir no a Raketa schieäa.

Moschen Anni

Anna fährt öfter bis auf Zams mit dem Bus,
und hat no viel zum erledigen bis Fahrplanschluss.
Am Huamweg schaut sie no in Landeck beim Frischemarkt vorbei,
nocha fährt schua wieder an Bus huamwerds aber glei.
Anna bleib weiter so mobil,
mir wünscha dir Glück und Gesundheit aber viel.

Wagner Walter Ingrid

Die Ingrid hat huira ihren 40er zelebriert,
und zu deam zweck a groaßas Festli organisiert.
Mit Live-Musi und an haufa Gäst,
ja sou weard deas a unvergesslichs Fest.
Aber macht aso a Feier überhaupt an Sinn?
alla sein da, es fahlt nu die Gastgeberin.
Angeblich bisch du als aller erschts ins Bett,
hasch vielleicht an kluana Durchhänger ket?
Zu deim Runda Geburtstag lassa mar dir iatz a Raketa singa,
dia schaut schian aus, und sell enk zwoa Glück bringa.

Fam Ruetz Markus

Dar Markus, wia mar wissa, isch in der Kirche sehr engagiert,
aber sal nit alluan, ou sei Frau promoviert.
Sie macht derzeit a Theologiestudium,
ja beim studiera geiht sou a Jahr glei schnellar um.
Dass beim studiera alla Prüfunga schafftsch und als guat louft,
hau mar enk iatz a Scheiba in Hof.

Huber Karin

Karin, bei dir kenna mar ins nit genau aus,
zum arbeita geahsch du in was für a Haus?
Da richtiga Job zum finda deas isch nit leicht,
aber Hauptsach a Gald, dar Rest isch deacht gleich.
Karin, als guate und viel Glück im nuia Johr,
und iatz hau mar für die a Scheiba durchhoh.

Fam Thurner Udo, Evelin

Dr Udo tuats huira eppa numma darworta
bis as schneit ocha vor'd Firma und in Gorta.
Der Grund iatz tia mars glouba
isch an morz Bagger mit ara Schaufla douba.
Settesch huira no a paar Stunde beim Schneerauma zum Eingwena broucha,
kannsch gera mit dem Gefährt um d' Fuirwehrhalle sausa.
Eppas innovativs des muaß her
so fliegt er nach Graz hin und her.
Als Wünschelroutengeher tuat si d'Udo iatz profiliera
wearsch eppa an Rohrbruch mit deine Finger wella gspiera.

Pammer Herbert Kathrein Anni

Dia Anni tuat Ihr Haus alli a bissli umgestallta,
und haut aussa die Möbel die alta.
Wie des alls schaffs isch insere Frag,
mir tian die alle bewunderea jeden Tag.
Mir winscha enk viel Gesundheit und Segä,
iats schicka no a Raketa aucha mit Goldrega.

FA Wucherer Heinz

Kaum hot er ongfonga, heart er wieder au
Die Firma Wucherer Bau.
Deas Personal wor olli freudlich und nett
Un miar hoffa, dass es glei a Nochfolge geba sett.
Dem nuia Team wünsch mar s'allerbescht
und lossa an Böller krocha ganz fescht.

FA Wille Harald

An Böll'r lossa miar iatz zearsch krocha
und tian bam Wille Harald a Station mocha.
Dia Firmaauto sei groaß, sall kenna miar v'r stiahn
Nu der Harry tua auf Haflingerauto stiahn.
Und daß ou dös Auto mocht an Sinn
transportiert er holt a poor Kista Bier hintadrin.
Dia „eiserne Reserve“ dia keahrt d'rzua
Sinsch hat d,r Harry sicher kua Ruah.

FA Wille Egon

Dia Scheiba isch aussì, weit und schian
iatz bleiba miar ba da Getränke Wille stiahn.
Dös isch für d'Fuirwehr nämlich gonz fein
Er deckt ins Fuirwehrhalle mit Getränk ein.
Göba tuats bam Wille foscht oll's
Wos flüssig isch und passt in an Hols
Dös tian d'Fuirwehrmander ou geniessa
Drum tian miar darzua nou an Böller schiassa.

Autohaus Zangerl

Letsch't Johr hat's Fuirwehrauto 2x numma wella giah
es hot's im Autohaus Zangerl tunkt viel z'schia.
S'Fuirwehrauto hot ins sekiert
ober es war glei wieder repariert.
Mir wünsch enk viel Glück im nächste Jahr
und an morz Umsatz deas isch ja klor.

Horvarth Martha

D' Martha und Carmen sieht ma oft alua umma gia,
des isch epas wos mir iatz gor it verstia.
Iatz hobats ja a so netts Hintli im Gorta,
muss des eppa dweil auf enk wortä?
Martha ober du hosch ja recht, loss des mit „gassi gia“ lei die Junga mocha,
dafür lossa dir no an onständiga Böller krocha.

Horvarth Thomas

Thomas mir hobas long it gwisst,
dass du politisch so engagiert bisch.
Auf Landesebene tuasch du die engagiera
und iatz in der Gemeindepolitik interveniera
Mit'r Julia gabs da an Idee,
deas war an nuier Grafer Schmäh.

Fam Horvarth Erich Elisabeth

Iatz dia mar d Elisabeth und in Erich begriassa,
wir mar wissa hobens iatz beide scho Bondscheiba operiereä miassa!
Für enkre Gsundheit tiats in Zukunft weniger schware Socha transportiera,
so klopt es ou gonz schnell mit'm generalsaniera.
Mir lossa iat no a Raketa steiga,
und die Scheibe set ou weit ausa treiba!

Horvarth Heidemarie

Iatz wissmar wieso d' Heidi seit nuiasten mim Auto zum Thurner-Haus aui rauscht,
sie hot a Zimmer gega a Wohnung tauscht.
Wie mar mitkriagt hoba bisch do ja scho richtig dahuam,
und wie ma sieht, nit ollia aluan.
Mir hoffe du tuasch ins in Grof no long erholta bleiba,
dafür lass mar no a Raketa steiga.

Fam Nitsche Kurdoglu Gerald Brigitte

Für Aquarelle braucht ma ja Wasser zum verinna
mit z'viel Wasser kansch aber kuan Preis gwinna.
An Rohrbruch im Atelier im Karnerwaldele hot der Gerhard ket
mit hoffa deine Bilder hoba des kebt.
A Raketa loss mar iatz no sausa
sie sell bis zum Karnerwaldele ausabrausa.

Fam Schmid Robert Monika

Im Robert mehta ma zum Geburtstag gratuliera
denn zum 80-er tia mir a schiane Raketa spendiera.
So manche Lausbubastreiche in deiner Nachborschaft, do konsch iatz sicher
schmunzla
und wenn drüber kansch locha, kema ou im Gsicht kuane Runzla.

Maidel Johann

Beim Hons gabs sicher interessante Gschichta
Vo dean miar nuit wissa, sinsch tat miar d'rüber brichta.
Z'seacha kriagt ma di leider nia
Für's Scheiba isch deas nit so schian.
Miar hoba mitkriagt, du tuscha numma so guat heara
dös sett di ober weiter nit steara.
Zuani Ohra war ou für ins manchsmol an Genuß,
wenn du dahuam an Onschiss kriagsch stott ama Kuß.
Miar hoffa, dass ma di huira öfter d'rblickt
A Scheiba weard aitz deswga ochigschickt.

Maidel Wilfried

Vom Willi isch nit leicht was z' dr froga
da isch es schwar eppas zu sogä.
Oans wiss ma er isch iatz nimma alloan
es isch iatz die Maria bei ihm dahoam.
Mir hoffa es tiatz de gemeinsame Zeit genießä
und tian a Raketa auchi schiaßä.

Matt Christian

Als Rat in der Abeiterkammer
ja Christian deis isch ja an Hammer!
Was sich tuat in der Kammer in Innsbruck zutroga
kenna mar iatz ja in der Fuirwehrsitzung dr'froga.
Für a Gspusi bleibt da iatz jo numma viel Zeit,
mir schloga dafür die Scheiba ocha gonz weit.

Fam Matt Richard Rosi

Dr Richard und d' Rosi haben a nuis Auto kouft,
weils olte leida numma louft.
Mit'm nuia Volvo winsch ma o guate Fahrt,
dass deis Auto huia kua Panne hot.
Trotz'm nuia Auto sein sie viel im Freia und gian spaziera mitnond
sogar monchmal ocha bis auf Zams.
Gsundheit und Glick bringt enk dia Scheiba
drum lass ma sie weit außä treiba.

Fam Matt Egon Annemarie

D' r Egon tuat o fremde Schäfer pflega,
da brauchsch im Alter o kuan kummer haba und nit überlega.
Zuerst kümmert er sich um a guats Fressa für die Hund,
und hinterm Haus haba sie Betreuung zu jeder Stund.
Egon mir winscha Dir und der Annemarie viel schiani Stunda im nuia Jahr,
iats no a Raketa aucha fliagt wunderbar.

Petter Johann

D'r Joschi isch als Sportler bekannt wie an bunter Hund,
sei liebstes Sportgerät isch ganz rund.
Fußball isch sei große Leidenschaft,
da spielt'r im Sommer bei so mancher Mannschaft.
Mir hoffa du tuasch bei d'r Olympiade insre Wintersportler die Dauma heba,
damit sie kenna viele Goldmedaillen erleba.

Heimhilcher Manuela

Bei dir Manuela kenna mar eppas schians berichta,
ja manchmal stiahn in dar Zeitung ou netta Gschichta.
Du hosch mit deim Kind eppas ganz Bsunders probiert,
eas hobats gemeinsam mit Delphine trainiert.
Deas war an großer Erfolg und hat viel bracht,
und für enk iatz nou an Böller krocht.

Franz Friedrich + Elisabeth

Friedrich und Elisabeth, es machatsas ins nit leicht,
als erst schiaßa mar für enk a Raketa ins Himmelreich.
Nit, dass es nuit angstellt habts,
s'Dumme isch lei, dass as niamand darfragt.
Und sou miaßa mar aufs negscht Jahr worda,
vielleicht hoba miar ja da bessere Korta.

FA Streng

Die Firma Streng isch olli am nuiesta Stond
Wenns um den Hondel gaeht mit Schotter und Sond.
A moderne Verladestation in Storkaboch tua er bauer,
wenn ma dös sieht, kann ma lei mia blead schaua.
Für die negscht Vision tian ins schua d'Ohra singa,
do weare sie nocha da Schotter unterirdisch vom Tol ochabringa.
Und dass deas Werk long und rentabel funktioniert,
von ins iatz nou a Raketa marschiart.

FA Walch + Plangger

Die Firma Walch und Plangger isch a relativ unauffällige Firma,
sie tuat si im Strengbau obenauf gut von der Strass abschirma.
Der Wasser und Kanalbau isch zum plana nit so leicht,
da isch viel Arbeitn dahinter bis des Wasser die Kläranlage erreicht.
Die Scheiba sell iatz weit ocha fliega,
so dass no viele Aufträge sella einifliaßa.

Geschäft Aglamaz

Obst, Gemüse und an Haufa Spezialitäten sein bei enk ganz fein,
qualitativ bisch da sicher ganz vorne dabei.
A freundliche Bedienung isch für enk kua Plag,
drum gibt's um enkre Wara meist a große Nachfrag.
Dass es weiterhin so guat loaft,
haba mir für enk no an Böller koaft.

Schröcker Evelin

Über Evelin wissa mir nichts zum Berichta,
da isch es schwarz was zum Dichta.
Sie sicht ma selta mit dem Auto vorbei flitza,
da musch aber fest dia Ohra spitza.
Evelin bleib nit so still,
weil mal o was tolles berichta will.

Fam Schröcker Hermann Elfriede

D´r Hermann tuat hinterm Haus des Brennholz aufmacha,
da haba die Leit von der Conti kua Arbeit und lacha.
Um s Haus isch alli was zum tian,
ob regnet oder isch Wetter schian.
Elfrieda tuat Ihre Pension genießä,
nach so viel Jahr braucht sie numma um Arbeit verdrießä.
Miar wünschä enk viel Glück im nuia Jahr,
und schiaßä a Reketa wunderbar.

Schröcker Franziska

Franziska tuat wia schua bekannt in Innsbruck studiera,
die Pendlerei jeden Tag mit dem Zug tuat sie iatz numma interessiera.
Sie hat sich a Wohnung zuglegt,
da isch iatz numma a so a gfrett.
Franziska tua nur weiter fleissig stucka,
nocha brauch´sch numma lang die Unibank drucka.

Bar Melody

Die Bar Melody isch weithin bekannt,
da gibt´s an guten Kaffee, sall woäß ma im ganzen Land.
Am Abend isch ganz fein a Bierli zupfa,
lei manchmal sieht ma auf a paar Fernseher so komische Mandla umchahupfa.
„Counter Strike“ - Turniere wera bei enk öfters austraga,
da kenna sich an Haufa Spieler mit ihre Controller umchaplaga.
Am Samstag, 27. Feber habets a Konzert (Band: "Blackout" - Daniel Schmid)
dies isch sicher an Bsuch wert.
Dass enk s'heurige Jahr ou wieder so guat gelingt,
die Scheiba b'sonders weit ausi singt.

Fam Hotz Martin & Maggi

Im Martin und dar Meggie steaht eppas wunderschians ins Haus,
drum baua dia zwoa ou a Wohnung aus.
Bald amol seids eas numma zu dritt sondern uaner mia,
miar gfrea ins mit enk, deas isch wunderschian.
Viel Glück und a schiane Zeit,
a Raketa sell steiga in Himmel ganz weit.

Hotz Monika

Monika geaht viel spaziera,
und tuat si in der Stadt infomiera.
Im letzta Jahr hat si da 70 er vollendent,
aber sie hat sich no nit dem Ruhestand zua g`wendet.
Mir winscha dir o no alles Gute für´s ganze Jahr,
iat´z no a Raketa fliagt aucha wunderbar.

Hotz Lydia und Beate

Di Beate und Lydia haba da ganza Summer baut,
und da Schutt von der Terrasse ocha kaut.
Die Platten nui verlegt und gega Wasser isoliert,
und a nui Garage Tür haba si sich ano spendiert.
Aber des Gelender von der Terrasse isch ersch schia,
ganz aus Glas sieht ma glei wie viel Gäst vor der Tür stiahn.
Tiats enk nu fest a Fremdaverkehr angaschiera,
drum lassa mir iats no an Böller explodiera.

Hotz Hannes

D`r Hannes pendelt zwischa Innsbruck u. Landeck her,
des Auto fohra mog er wohl sehr.
Sei Bus war zwar o schua defekt,
aber iatz loaft a wieder perfekt.
Die Kundschaften sei im Bezirk so verstrat,
da werd´s am Abend oft spat.
Hannes es isch für die a schiane Scheiba g´floga,
die sell nur für di sein - gar nit gloga

Fam Hotz Oskar Edith

D´r Oskar tuat sei Pension genieß,
und um sei Kartnerrunde nit verdrieß.
Beim G´ Straudi isch er jeden Montag zur gleichen Zeit,
da treffen sich die Kartner-es sei an haufa Leit.
Für die Edith isch des Kartna nit von Bedeutung,
sie hat lieber mit anderen Frauen a gute Unterhaltung.
Mir winscha enk no viel Glück im nuia Jahr ,
iats fliegt no a Scheiba wunderbar.